

RADIONICA O KOMASACIJI ZEMLJIŠTA U SARAJEVU

U okviru tekućeg FAO (Food and Agriculture Organization of the United Nations) projekta „Podrška izradi Nacionalne strategije komasacije i provedbi pilot projekata komasacije u Bosni i Hercegovini“ (TCP/BiH/3391) održana je regionalna radionica o komasacijama zemljišta 19-20 februara 2013. godine u Sarajevu. Radionica je upriličena u hotelu Bosnia, uz učešće sudionika s prostora cijele bivše Jugoslavije. Većina republika bivše Jugoslavije implementirala je još prije 1990. projekte komasacije većeg obima, često u sprezi s poljoprivrednim infrastrukturnim projektima. Današnje države na prostoru Zapadnog Balkana imaju slična iskustva s provođenjem komasacija zemljišta. Cilj ove radionice bila je razmjena novijih iskustava u razvoju primjeni modernih alata komasacije i spoznaja trenutnih aktivnosti na polju komasacije u zemljama bivše Jugoslavije. Skupu je prisustvovalo više od 40 učesnika iz svih novonastalih država, koji su iznijeli svoja iskustva putem prezentacija i diskusija na radionici. Nove spoznaje će biti od velike koristi pri izradi strategije komasacija u Bosni i Hercegovini. Sve prezentacije održane na radionici mogu se preuzeti na stranici FAO ureda za Evropu i Centralnu Aziju:

<http://www.fao.org/europe/meetings-and-events-2013/lc-bih/en/>.




Slika 1: Sudionici radionice

(izvor: <http://www.fao.org/europe/meetings-and-events-2013/lc-bih/en/>)

U okviru spomenutog projekta se radi i pilot projekat komasacije dobrovoljnog tipa na dva lokaliteta u Popovom polju. Lokalitet u Općini Ravno (FBiH) se mijenjao jer je prvobitno planirana K.O. Luke kasnije uključena u projekat sveobuhvatne klasične komasacije. Sada je

aktuelna K.O. Trnčina i dio K.O. Velja međa. Drugi lokalitet se nalazi u Općini Trebinje (RS) i obuhvata prostor K.O. Dračevo).



Slika 2: Pilot područje komasacije u K.O. Trnčina (Općina Ravno)

Na dokumentu Strategije rade tri Nacionalna konsultanta (iz oblasti geodezije, prava i ekonomije), koji ujedno rukovode i aktivnostima lokalnih timova u Ravnom i Trebinju koji također imaju po tri člana (pravnik, geodet i agronom). Internacionalni konsultanti vode čitav postupak i održavaju određene seminare o temama vezanim za projekat.

Projekat se implementira pod okriljem Ministarstva vanjske trgovine i ekonomskih odnosa BiH u saradnji sa entitetskim ministarstvima poljoprivrede koje zastupaju njihovi predstavnici (focal points). Aktivnosti nadzire tehnička radna grupa TWG (Technical Working Group), u kojoj se nalaze predstavnici entitetskih geodetskih uprava, ministarstava poljoprivrede, instituta, fakulteta i drugih relevantnih institucija.

Esad Mahir